


Aruba tambe ta representa den e '9th Changchun International Sculpture Symposium'



ORANJESTAD - Escultornan di rond mundo un biaha mas ta uni na Changchun, e capital di provincia Jilin di e parti Nord Oeste di China, pa contribui cu nan obranan original cu e meta pa hasi di e ciudad aki un centro di arte di prestigio y reputacion nacional pero seguramente internacional.

E "9th Changchun International Sculpture Symposium" cu a cuminsa dia 26 di juli ta tuma lugar na e Changchun international parke di escultura y lo termina riba 5 di September venidero. Artistanan di 39 pais y regionan rond mundo, incluyendo USA, Canada, Francia, Belarus, New Zealand, Serbia, Saudi Arabia, Oman, St. Vincent, Curaçao y Aruba ta bezig awor ta finalizando nan esculturanan. Un dia promer cu e exposicion lo sera e artistanan lo bin huntu un biaha mas pa e '2nd Changchun International Sculptors Conference' pa discuti y comparti nan sabiduria y combersa den un forma universal y amical pa duna e publico y e critico di arte un bista di kico ta pasa

den proceso y den e cabes di e artista.

Desde 1997 Changchun a "host" nueve sessionnan di e Sympio International di escultura, treciendo escultornan di 172 pais y regionan rond mundo.

E burgemeester di Changchun Cui Jie, ta describi e exhibicion como "Un grandeza di un show cu e cortina nunca ta cai", paso tur e esculturanan traha aki na Changchun lo keda mas aprecia pero tambe pa duna elogio y prestigio na e ciudadanonan di Changchun. "Mi ta asina contento cu Changchun ta e showcase di y un exhibicion di asina un magnitud", e burgemeester a bisa. "E delaster decada Changchun a logra progresa socialmente y economicamente y asina ta laga nos hiba e ciudad su iniciativa cultural na un nivel mas haltu", e Cui Jie ta remarca. "Cultura y arte ta esencial pa mehora e smaak di nos pueblo y alaves ta enriquece e imago di e ciudad." Changchun conoce diferente

shows cu tambe ta pone ciudad riba e mapa Chines destaca, manera su fabrica di auto y industria di film, pero tambe su espacionan disponible pa beurs y exhibicion chikito pa cu e comercio di Nord Oeste di China. Compara cu e shownan ey en evento aki ta uno sin funcion commercial y e ta uno stricto cultural. "Dimes cu naturalmente e show aki a bira un brug entre Changchun y e resto di mundo y indirectamente a duna un boost na e turismo di e ciudad. Esaki ta algo cu nos tur ta hopi contento cune", e la agredi.

Na e momento aki 400 escultura di artistanan di mas cu 170 diferente pais y regionan tin obranan permanente den e parke international di escultura di Changchun. Cu un area di 918,000 metro cuadra, e parke a wordo construi na 2002 y a wordo finaliza na 2004. E ta e unico parke tematico mustrandu arte contemporaneo di artistanan mundial. E Museo di Escultura, cubriendo un espacio di 12,000 metros cuadra, ta situa na e parti este di e parke y ta wordo usa pa mostra e esculturanan destacante di rond mundo.

Na 2006 e parke internacional di escultura di Changchun

tabata un di e promer parke pa wordo poni riba e lista di "Parkenan Esencial di e Cultura Chino" hunto cu e parkenan antiguo manera e Summer Palace na Beijing y e Humble Administrator's Garden na Suzhou.

E parke ta un muestra di aprecio cultural y e economia di Changchun, pero tambe di China caminda economia ta bay man den man cu arte. Ryan Oduber, representando Aruba cu e piesa yama "Energia" ta splica cu e obra ta simboliza e cadushi y su perseverancia eterno.

E ta e energia di e hende Arubiano pa crea su mes un futuro los di e mama patria. "E cadushi lo no muri si bo kap e, e lo djis bira mas grandi cu tempo", Ryan ta comenta. E obra ta un obra monumental, e ta duna aprecio na su cultura. "E ta e escultura di mas grandi, mi no tabata sa esey na e promer instante, pero alaves e ta conta di e emocionnan y balor cu mi tin pa mi cultura, maske ke ta uno joven y naif ainda", e artista ta bisa. "Aruba mester determina pa caba cu arte mester forma parti di su economia, siendo den turismo of como un entidad autonomo." E Arubianonan no tin un idea con hopi e arte

Arubiano contemporaneo ta wordo aprecia y sigui rond mundo y esey ta duel no solamente mi persona pero e ta algo cu ta un punto cardenal pa cu e otro artistanan tambe," e artista ta agrega. "Mi sa cu e pueblo no tin e culpa, pero e gobernantenan y e institucionnan commercial mester duna mas apoyo na arte, no solamente pa nan "comapania" wordo relaciona cu e rikeza di cultura pero mas ainda pa nan yiunan cu ta wordo lanta awor sin aprecio pa arte", Ryan ta clausura.

E obra di Ryan, mescos cu e 50 porciento di artistanan lo wordo hasi den brons. Pero promer nan ta wordo traha den fiberglass pa e opening pa asina e obranan ta mas facil pa transporta y poni hunto pa e publico disfruta. Nan ta hasi un copia di e obra cu Ryan a traha cu un estructura di hero y cubri cu klei pa despues e wordo copia den fiberglass. E obranan lo wordo basha den brons despues y lo keda cla na November benidero.

Pa informacion di e artista por bay riba www.ryanoduber.com y pa videonan di e evento y videonan di e obra di Ryan Oduber por bay riba <http://your.sve.tv/racho>

